



ՀԱՆԳԻՍՏ
ԱՐԺԱՆԱՊԱՏԻՎ Տ. ՕՇԱԿԱՆ ԱՎԱԳ ՔԱՀԱՆԱ ԳԼԸԾՅԱՆԻ
(1917—1992)

1992 թվականի հուլիսի 5-ին Էլ Քինտի (Իրաք) հիվանդանոցում իր մահկանացուն կնքեց Իրաքի հայոց թեմի երկարամյա հոգևոր հովիվ արժանապատիվ Տ. Օշական ավագ քահանա Գլըճյանը:

Հանգուցյալ արժանապատիվ տեր հայրը ծնվել է 1917 թվականին Քերթում (Անդր Հորդանան), ավագանի անունով՝ Գրիգոր, վաղամեռիկ հոր անունով:

Նախնական կրթությունը ստացել է Բեյրութի Սահակյան ազգային վարժարանում: Երկու տարի հետևել է ֆրանսիական ֆրեյների քոլեջի դասընթացներին: Ընտանիքի ծանր պայմաններից ելնելով թողել է ուսումը և անցել աշխատանքի՝ միաժամանակ զբաղվելով ինքնազարգացմամբ: Այնուհետև ուսուցչական պաշտոն է վարել Պուրճ Համուտի Սահակյան վարժարանում, ապա նշանակվել նույն վարժարանի տնօրեն:

Երեք տարի եղել է Դամասկոսի հայոց Ա. Սարգիս եկեղեցու դպրապետ: Դամասկոսում և այլ վայրերում պաշտոնավարելու ընթացքում արժանապատիվ տեր հայրը միաժամանակ մասնակցել է մշակութային, գեղարվեստական և մարզական գործի զարգացման աշխատանքներին:

Անսալով իր կոչումի ձայնին և ընդառաջելով Քերթուկի (Իրաք) թաղական խորհրդի հրավերին, 1966 թվականի նոյեմբերի 19-ին, ձեռամբ երջանկահիշատակ Տ. Ասողիկ արքեպիսկոպոս Ղազարյանի, ձեռնադրվել է քահանա՝ վերանվանվելով Տ. Օշական քահանա:

Վեց տարի Քերթուկում իբրև հոգևոր հովիվ պաշտոնավարելուց հետո, 1973 թվականին տեղափոխվել է Բաղդադ:

1986 թվականին, քահանայական ձեռնադրության 20-ամյակի առթիվ, Իրաքի հայոց թեմի թեմակալ առաջնորդ գերաշնորհ Տ. Ավագ եպիսկոպոս Ասատուրյանի միջնորդությամբ Նորին Սուրբ Օծություն Տ. Տ. Վազգեն Ա Ամենայն Հայոց Կաթողիկոսի կողմից արժանացել է ավագության պատվի և իրավունք ստացել կրելու ծաղկյա փիլոն:

Իր հոգևոր ծառայության իբրև գնահատանք Ս. Օշական ավագ քահանա Գլընյանը արժանիորեն վայելել է Իրաքի հայ հավատավոր ժողովրդի սերն ու հարգանքը:

1992 թվականի հուլիսի 7-ին, երեքշաբթի օրը, կեսօրից հետո, ժամը 14-30-ին, Բաղդադի հայոց Ա. Գրիգոր Լուսավորիչ եկեղեցում կատարվեց Ս. Օշական ավագ քահանայի վերջին օծումը և հուղարկավորությունը, իսկ ազգային նոր գերեզմանատանը կատարվեց հանգուցյալի թաղման արարողությունը, որտեղ և ամփոփվեց նրա աճյունը:

Երկնային խաղաղություն տեր հոր հոգուն:

